

四庫全書

史部

欽定四庫全書

史部  
陝西通志卷八十六

詳校官監察御史<sub>臣</sub>劉湄

檢討<sub>臣</sub>德生覆勘

總校官降調編修<sub>臣</sub>倉聖脉

校對官中書<sub>臣</sub>王家賓

謄錄監生<sub>臣</sub>章玉植

欽定四庫全書

陝西通志卷八十六

藝文二

奏疏

諫除上林苑

漢東方朔

臣聞謙遜靜慤天表之應應之以福驕溢靡麗天表之  
應應之以異今陛下累郎臺恐其不高也弋獵之處恐  
其不廣也如天不為變則三輔之地盡可以為苑何必  
鑿屋鄠杜乎奢侈越制天為之變上林雖小臣尚以為

大也夫南山天下之阻也南有江淮北有河渭其地從  
汧隴以東商雒以西厥壤肥饒漢興去三河之地止霸  
產以西都涇渭之南此所謂天下陸海之地秦之所以  
虜西戎兼山東者也其山出玉石金銀銅鐵豫章檀栢  
異類之物不可勝原此百工所取給萬民所仰足也又  
有秔稻梨栗桑麻竹箭之饒土宜薑芋水多蠃魚負者  
得以人給家足無饑寒之憂故鄠鎬之間號為土膏其  
賈畝一金今規以為苑絕陂池水澤之利而取民膏腴



之地上乏國家之用下奪農桑之業棄成功就敗事損  
耗五穀是其不可一也且盛荆棘之林而長養麋鹿廣  
狐兔之苑大虎狼之虛又壞人塚墓發人室廬令幼弱  
懷土而思耆老泣涕而悲是其不可二也斥而營之垣  
而囿之騎馳東西車驚南北又有深溝大渠夫一日之  
樂不足以危無隄之輿是其不可三也故務苑囿之大  
不恤農時非所以彊國富人也夫殷作九市之宮而諸  
侯畔靈王起章華之臺而楚民散秦興阿房之殿而天

下亂冀土愚臣忘生觸死逆盛意犯隆指罪萬當死不勝大願願陳泰階六符以觀天變不可不省

乞種麥限田章

董仲舒

春秋他穀不書至於麥禾不成則書之以此見聖人於五穀最重麥與禾也今關中俗不好種麥是歲失春秋之所重而損生民之具也願陛下幸詔大司農使關中民益種宿麥令毋後時況古者稅民不過什一其求易共使民不過三日其力易足民財內足以養老盡孝外足

以事上共稅下足以畜妻子極愛故民說從上至秦用  
商鞅之法改帝王之制除井田民得賣買富者田連阡  
陌貧者無立錫之地又潁川澤之利管山林之饒荒淫  
越制踰侈以相高邑有人君之尊里有公侯之富小民  
安得不困又加月為更卒已復為正一歲屯戍一歲力  
役三十倍於古田租口賦鹽鐵之利三十倍於古或耕  
豪民之田見稅什五故貧民常衣牛馬之衣而食犬彘  
之食重以貪暴之吏刑戮妄加民愁無聊逃亡山林轉

為盜賊赭衣半道斷獄歲以千萬數漢興循而未改古井田法雖難卒行宜小近古限民名田以贍不足塞并兼之路鹽鐵皆歸於民去奴婢除專殺之威薄賦斂省繇役以寬民力然後可善治也

訟王尊書

公乘興

往者南山盜賊阻山橫行剽劫良民殺奉法吏道路不通城門至以警戒步兵校尉使逐捕暴師露衆曠日煩費不能禽制二卿坐黜羣盜寢彊吏氣傷沮流聞四方

為國家憂當此之皆有能捕斬不愛金爵重賞關內侯  
寬中使問所徵故司隸校尉王尊捕羣盜方畧拜為諫  
大夫守京輔都尉行京兆尹事尊盡節勞心夙夜思職  
卑體下士厲奔北之吏起沮傷之氣二旬之間大黨震  
壞渠率效首賊亂蠲除民反農業拊循貧弱鉏耰豪彊  
長安宿豪大猾東市賈萬城西萬章箭張禁酒趙放杜  
陵楊章等皆通邪結黨挾養姦軌上干王法下亂吏治  
并兼役使侵漁小民為百姓豺狼更數二千石二十年

莫能禽討尊以正法按誅皆伏其辜姦邪銷釋吏民說服尊撥劇整亂誅暴禁邪皆前所稀有名將所不及雖拜為真未有殊絕褒賞加於尊身今御史大夫奏尊傷害陰陽為國家憂無承用詔書之意靜言庸違象恭滔天原其所以出御史丞楊輔故為尊書佐素行陰賊惡口不信好以刀筆陷人於法輔常醉過尊大奴利家利家梓博其頰兄子閎拔刀欲剄之輔以故深怨疾毒欲傷害尊疑輔內懷怨恨外依公事建畫為此議傳致奏

文浸潤加誣以復私怨昔白起為秦將東破韓魏南拔  
郢都應侯譖之賜死杜郵吳起為魏守西河而秦韓不  
敢犯讒人間焉斥逐奔楚秦聽浸潤以誅良將魏信讒  
言以逐賢守此皆偏聽不聰失人之患也臣等竊痛傷  
尊修身潔已砥節首公刺譏不憚將相誅惡不避豪彊  
誅不制之賊解國家之憂功著職修威信不廢誠國家  
爪牙之吏折衝之臣今一旦無辜制於仇人之手傷於  
詆欺之文上不得以功除臯下不得蒙棘木之聽獨掩

怨讐之偏奏猥被共工之大惡無所陳怨愬辜尊以京師廢亂羣盜並興選賢徵用起家為卿賊亂既除豪猾伏辜即以佞巧廢黜一尊之身三期之間乍賢乍佞豈不甚哉孔子曰愛之欲其生惡之欲其死是惑也浸潤之譖不行焉可謂明矣願下公卿大夫博士議郎定尊素行夫人臣而傷害陰陽死誅之辜也靜言庸違放殛之刑也審如御史章尊乃當伏觀闕之誅放於絕人之域不得苟免及任舉尊者當獲選舉之辜不可但已即



不如章飾文深詆以想無辜亦宜有誅以懲讒賊之口  
絕詐欺之路唯明主參詳使白黑分別

論罷昌陵

劉向

臣聞易曰安不忘危存不忘亡是以身安而國家可保  
也故賢聖之君博觀終始窮極事情而是非分明王者  
必通三統明天命所授者博非獨一姓也孔子論詩至  
於殷士膚敏裸將於京喟然歎曰大哉天命善不可不  
傳於子孫是以富貴無常不如是則王公其何以戒慎

民萌何以勸勉蓋傷微子之事周而痛殷之亡也雖有堯舜之聖不能化丹朱之子雖有禹湯之德不能訓末孫之桀紂自古及今未有不亡之國也昔高皇帝既滅秦將都雒陽感寤婁敬之言自以德不及周而賢於秦遂徙都關中依周之德因秦之阻世之長短以德為效故常戰栗不敢諱亡孔子所謂富貴無常蓋謂此也孝文皇帝居霸陵北臨廁意悽愴悲懷顧謂羣臣曰嗟乎以北山石為槨用紵絮斷陳漆其間豈可動哉張釋之

進曰使其中有可欲雖錮南山猶有隙使其中無可欲  
雖無石槨又何感焉夫死者無終極而國家有廢興故  
釋之之言為無窮計也孝文寤焉遂薄葬不起山墳易  
曰古之葬者厚衣之以薪藏之中野不封不樹後世聖  
人易之以棺槨棺槨之作自黃帝始黃帝葬於橋山堯  
葬濟陰丘壠皆小葬具甚微舜葬蒼梧二妃不從禹葬  
會稽不改其列殷湯無葬處文武周公葬於畢秦穆公  
葬於雍橐泉宮祈年館下櫟里子葬於武庫皆無丘壠

之處此聖帝明王賢君智士遠覽獨慮無窮之計也其  
賢臣孝子亦承命順意而薄葬之此誠奉安君父忠孝  
之至也夫周公武王弟也葬兄甚微孔子葬母於防稱  
古墓而不墳曰丘東西南北之人也不可不識也為四  
尺墳遇雨而崩弟子修之以告孔子孔子流涕曰吾聞  
之古者不修墓蓋非之也延陵季子適齊而反其子死  
於贏博之間穿不及泉斂以時服封墳掩坎其高可隱  
而號曰骨肉復歸於土命也魂氣則無不之也夫贏博

去吳千有餘里季子不歸葬孔子往觀曰延陵季子於  
禮合矣故仲尼孝子而延陵慈父舜禹忠臣周公弟弟  
其葬君親骨肉皆微薄矣非苟為儉誠便於體也宋桓  
司馬為石槨仲尼曰不如速朽秦相呂不韋集知畧之  
士造春秋亦言薄葬之義皆明於事情者也逮至吳王  
闔閭遠禮厚葬十有餘年越人發之及秦惠文武昭莊  
襄五王皆大作丘壠多其瘞藏或盡發掘暴露甚足悲  
也秦始皇帝葬於驪山之阿下錮三泉上崇山墳其高

五十餘丈周回五百有餘石槨為游館人膏為燈燭水銀為江海黃金為鳬雁珍寶之藏機械之變棺槨之麗宮館之盛不可勝原又多殺宮人生葬工匠計以萬數天下苦其役而反之驪山之作未成而周章百萬之師至其下矣項籍燔其宮室營宇往者咸見發掘其後牧兒亡羊羊入其鑿牧者持火照求羊失火燒其藏槨自古及今葬未有盛如始皇者也數年之間外被項籍之災內罹牧豎之禍豈不哀哉是故德彌厚者葬彌薄知

愈深者葬愈微無德寡知其葬愈厚丘壠彌高宮廟甚  
麗發掘必速由是觀之明暗之效葬之吉凶昭然可見  
矣周德既衰而奢侈宣王賢而中興更為儉宮室小寢  
廟詩人美之斯千之詩是也上章道宮室之如制下章  
言子孫之衆多也及魯莊公刻飾宗廟多築臺囿後嗣  
再絕春秋刺焉周宣如彼而昌魯秦如此而絕是則奢  
儉之得失也陛下即位躬親節儉始營初陵其制約小  
天下莫不稱賢明及徙昌陵增埤為高積土為山發民

墳墓積以萬數營起邑居期日迫卒功費大萬百餘死者恨於下生者愁於上怨氣感動陰陽因之以饑饉物故流離以十萬數臣甚惜焉以死者為有知發人之墓其害多矣若其無知又安用大謀之賢知則不說以示衆庶則苦之若苟以說愚夫淫侈之人又何為哉陛下慈仁篤美甚厚聰明疏達蓋世宜弘漢家之德崇劉氏之美光昭五帝三皇而顧與暴秦亂君競為奢侈比方丘壠說愚夫之目隆一時之觀違賢知之心亡萬世之



安臣竊為陛下羞之唯陛下上覽明聖黃帝堯舜禹湯  
文武周公仲尼之制下觀賢知穆公延陵樗里張釋之  
之意孝文皇帝去墳薄葬以儉安神可以為則秦昭始  
皇增山厚藏以侈生害足以為戒初陵之撫宜從公卿  
大臣之議以息衆庶

議復三郡

虞詡

臣聞子孫以奉祖為孝君上以安民為明此高宗周宣  
所以上配湯武也禹貢雍州之域厥田惟上且沃野千

里穀價殷積又有龜茲鹽池以為民利

上郡龜茲縣有鹽官即今榆林

府地水草豐美土宜產牧牛馬銜尾羣羊塞道北阻河山

乘院據險因渠以溉水春河漕用功省少而軍糧饒足

故孝武皇帝及光武築朔方開西河置上郡皆為此也

而遭元元無妄之災衆羌內潰郡縣兵荒二十餘年夫

棄沃壤之饒損自然之財不可謂利離河山之阻守無

險之處難以為固今三郡未復

安定北地三郡

園陵單外而公

卿選懦容頭過身張解設難但計所費不圖其安宜開

聖德考行所長

請取漢中

法正

曹操一舉而降張魯定漢中不因此勢以圖巴蜀而留  
夏侯淵張郃屯守身遽北還此非其智不逮而力不足  
也必將內有所偏故耳今策淵郃才畧不勝國之將帥  
舉衆往討則蜀可克克之日廣農積穀觀釁伺隙上  
可以傾覆寇敵尊獎王室中可以蠶食雍涼廣拓境土  
下可以固守要害為持久之計此蓋天以與我時不可

失也

諫用兵南鄭

魏劉資

昔武皇帝征南鄭取張魯陽平之役危而後濟又自往  
拔出夏侯淵軍數言南鄭直為天獄中斜谷道為五百  
里石穴耳言其深險喜出淵軍之辭也又武皇帝勝於  
用兵察蜀賊栖於山巖視吳虜竄於江湖皆撓而避之  
不責將士之力不爭一朝之忿誠所謂見勝而戰知難  
而退也今若進軍就南鄭討亮道既險阻計用精兵又

轉運鎮守南方四州遏禦水賊凡用十五六萬人必當  
復更有所發興天下騷動費力廣大此誠陛下所宜深  
慮夫守戰之力力後參倍但以今日見兵分命大將據  
諸要險威足以震懾強寇鎮靜疆場將士虎睡百姓無  
事數年之間中國日盛吳蜀二虜必自罷斃

請追贈魏興太守吉挹

晉  
桓冲

故輕車將軍魏興太守吉挹祖朗西臺傾覆隕身守節  
挹世篤忠孝乃心本朝臣亡兄溫昔伐咸陽軍次灞水

挹攜將二弟單馬來奔錄其此誠仍加擢授自新野太  
守轉在魏興又處兵任委以邊戍疆場歸懷著稱所莅  
前年狡氏縱逸浮河而下挹孤城獨立衆無一旅外摧  
凶銳內固津要虜賊舟船俘馘千計而賊并力攻圍經  
歷時月會襄陽失守邊情沮喪加衆寡勢殊以至陷沒  
挹辭氣慷慨志在不辱仗刃推戈期之以隕將吏持手  
用不即斃遂乃杜口無言絕粒而死挹叅軍史頴近於  
賊中得還賫挹臨終手疏并具說意狀挹之忠志猶在

可錄若蒙天施垂曲宥之恩則榮加枯朽惠隆泉壤矣

請西都關中奏

北周

王思政

高歡之心行路所共知矣洛陽四面受敵非用武之地  
關中有崤函之固一人可禦萬夫且士馬精強糧儲委  
積進可以討除逆命退可以保據關河宇文夏州糾合  
同盟願立功效若聞車駕西幸必當奔走奉迎藉天府  
之資因已成之業一二年間習戰陣勸耕桑修舊京何  
慮不克

請車駕還京

唐 郭子儀

臣聞雍州之地古稱天府左控隴蜀右扼嶠函前有終南太華之險後有清渭濁河之固神明之興王者所都地方數千里帶甲十餘萬兵強士勇雄視八方有利則出攻無利則入守此用武之國非諸夏所同秦漢因之卒成帝業其後或處之而泰去之而亡前史所書不唯一姓及隋氏季末煬帝南遷河雒丘墟兵戈亂起高祖倡義亦先入關唯能剪滅姦雄底定區宇以至於太宗



高宗之盛中宗玄宗之明多在秦川鮮居東雒間者羯胡構亂九服分崩河北河南盡從逆命然而先帝仗朔方之衆慶緒奔亡陛下藉西土之師朝義就戮豈惟天道助順抑亦地形使然此陛下所知非臣飾說近因吐蕃凌逼鑾駕東巡蓋以六軍之兵素非精練皆市肆屠沽之人務挂虛名苟備征賦及驅以就戰百無一堪亦有潛輸貨財因以求免又中官掩蔽庶政多荒遂令陛下振蕩不安退居陝服斯蓋關於委任失所豈可謂秦

地非良者哉今道路云云不知信否咸謂陛下已有成命將幸雒都臣熟思其端未見其利夫以東周之地久陷賊中宮室焚燒十不存一百曹荒廢曾無尺椽中間畿內不滿千戶井邑榛棘豺狼所嗥旣乏軍儲又鮮人力東至鄭汴達於徐方北自覃懷徑於相土人烟斷絕千里蕭條將何以奉萬乘之牲餼供百官之次舍矧其土地狹阨纔數百里間東有成臯南有二室險不足恃適為戰場陛下奈何棄久安之勢從至危之策忽社稷

之計生天下之心臣雖至愚竊為陛下不取且聖旨所慮豈不以京畿新遭剽掠田野空虛恐糧食不充國用有闕以臣所見深為不然昔衛文公小國之臣諸侯之主耳遭懿公為狄所滅始廬於漕衣大布之衣冠大帛之冠元年革車三十乘季年三百乘卒能恢復舊業享無疆之休況明明天子恭儉節用苟能黜素餐之吏去冗食之官抑豎刁易牙之權任蘧瑗史鮪之直薄征弛力卹隱追鰥委諸相以簡賢任能付老臣以練兵禦侮

則黎元自理盜賊自平中興之功旬月可冀卜年之期  
永永無極矣願時邁順動迴鑾上都再造邦家維新庶  
政奉宗廟以修薦享謂陵寢以崇孝思臣雖隕絕死無  
所恨

鑾駕將還宮闕論發日狀

節

陸贄

褒斜峻阻素號畏途緣側逕於巔巖綴危棧於絕壁或  
百里之內歷險且千或一程之中涉水數四若遇積雨  
滯浸羣峯澍流巨石崩奔旬殷相繼深谷瀰漫往來不

通悉非功力之所支籌略之所遏斯須之頃跬步之間  
倉黃遘殃皆不可測匹夫單騎尚且過防況萬乘時行  
千官景從而可以臨不存之險冒無禦之災乎如或磴  
路淩崩閣道淹圯環衛之儀少闕屬車之馬微驚縱有  
億徒何所為用陛下欲無駭慮其可得乎又或霑滯更  
深谿澗皆溢逕路既絕傳送無由連山萬里進退不可  
一日乏食將如之何陛下欲無軫憂固亦難矣人主舉  
措宜圖萬全必先事以防危不臨危而求幸幸而獲濟

貽愧已深不幸罹災追悔何及孔子曰欲速則不達誠哉是言臣今非敢阻陛下欲速之情但頗以不達為慮耳

言邊事

宋 宋琪

臣頃任延州節度判官經涉五年雖未嘗躬造夷落然嘗令蕃落將和斷公事歲無虛月蕃部之事熟於聽聞大約党項吐蕃風俗相類其帳族有生戶熟戶接連漢界入州城者謂之熟戶居深山僻遠橫過寇畧者謂之

生戶其俗多有世讐不相來往遇有戰鬪則同惡相濟  
傳箭相率其從如流雖各有鞍甲而無魁首統攝並皆  
散漫山川居常不以為患党項界東自河西銀夏西至  
靈鹽南距鄜延北連豐會厥土多荒隙是前漢呼韓邪  
所處河南之地幅員千里從銀夏至青白兩池地惟沙  
磧俗謂平夏拓拔蓋蕃姓也自鄜延以北多土山栢林  
謂之南山野利蓋羌族之號也從延州入平夏有三路  
一東北自豐林縣葦子驛至延川縣接綏州入夏州界

一正北從金明縣入蕃界至蘆關四五百里方入平夏  
州南界一西北歷萬安鎮經水安城出洪門至宥州四  
五百里是夏州西境我師如入夏州之境宜先招致接  
界熟戶使為鄉道其強壯有馬者令去官軍三十五里  
踏白先行緣此三路土山栢林谿谷相接而復隘陜不  
得成列躡此鄉道可使步卒多持弓弩搶鋸隨之以二  
三千人登山偵邏俟見坦途寧靜可傳號勾馬導路而  
行我皆嚴備保無虞也長興四年夏州李仁福死有男



彛超擅稱留後當時詔延州安從進與李彛超換鎮彛  
超據夏州固不奉詔朝廷命邠州藥彥稠總兵五萬送  
從進赴任時頓兵城下議欲攻取軍儲不繼遽命班師  
而振旅之時不能嚴整失戈棄甲遂為邊人之利臣又  
聞黨項號為小蕃非是勅敵若得出山布陣止勞一戰  
便可盪除深入則饋運艱難窮追則窟穴幽隱莫若緣  
邊州鎮分屯重兵俟其入界侵漁方可隨時掩擊非惟  
養勇亦足安邊凡烏合之徒勢不能久利於速鬪以逞

兵鋒莫若持重守疆以挫其銳彼無城守衆乏餼糧威賞不行部族分散然後密令覘其保聚之處預於麟府廊延寧慶靈武等州約期會兵四面齊進絕其奔走之路合勢擊之可以剪除無噍類矣仍先告語諸軍擊賊所獲生口資畜許為已有彼為利誘則人百其勇也靈武路自通達軍入青岡峽五百里皆蕃部熟戶向來使人商旅經由並在部族安泊所求賂遺無幾謂之打當亦如漢界逆旅之家宿食之直也此時大軍或須入其

境則鄉道蹠白當如夏州之法況彼靈州便是吾土芻粟儲蓄率皆有備緣路五七程不煩供饋止令逐都兵騎裹糧輕齎便可足用諺語所謂磨鑱殺馬劫一時之力也旬浹之餘固無闕乏矣

攻守方略疏

陳執中

元昊乘中國久不用兵竊發西陲以游兵困勁卒甘言悅守臣一旦連犯亭障延安幾至不保此蓋范雍納詭說失於戒嚴劉平輕躁喪其所部上下紛攘遠近震駭

自金明李士彬族破而並邊籬落皆大壞塞門金明相  
距二百里宜列修三城城兵千人益募弓箭手寇大至  
則退保小至則出關選閭門祇候以上為塞主都監以  
諸司使為蘆關一路都巡檢以兵二千屬之使為三砦  
之援熟羌居漢地久者委邊臣拊存之反覆者破逐之  
至於新附黠羌如涇原康奴滅臧大蟲族久居內地常  
有叛心不肆剪除恐終為患今軍須之出民已愁歎復  
欲徧修城池如河北之制及夏須成使神運之猶恐不

能民力其堪此乎陝西地險非如河北惟涇州鎮戎軍  
勢稍平易若不責外守而勞內營非策之上也宜先並  
邊城池其次如延州之鄜同環慶之邠寧不過五七處  
量為營葺則科率減民力蘓矣今賊勢方張宜靜守以  
驕其志蓄銳以挫其鋒增土兵以備守禦省騎卒以減  
轉餉然後徐議盪平改張制度更須主張將臣橫議不  
入則忠臣盡節而捐軀矣

論西事劄子

范仲淹

臣聞兵家之事在先觀虛實之勢實則避之虛則攻之  
今緣邊城塞有五七分之備而關中之備無三二分若  
昊賊知我虛實必先脅邊城不出戰則深入乘關中之  
虛小城可破大城可圍或東阻潼關隔兩川貢賦緣邊  
懦將不能堅守則朝廷不得高枕矣為今之計莫若且  
嚴邊城使永久可守實關內使無虛可乘西則邠州鳳  
翔為環慶源渭之聲援北則同州河中府扼廊延之要  
害東則陝府華州據黃河潼關之險中則永興為都會

之府各須屯兵三二萬人若寇至使邊城清野不與大戰關中稍實豈敢深入復命五路修攻取之備張其軍聲分彼賊勢使弓馬之勁無所施牛羊之貨無所集三年間彼自困弱待其衆心離叛自有間隙則行天討此朝廷之上策也又聞邊臣多請五路入討臣竊計之恐未可以輕舉也太宗朝以宿將精兵北伐西討艱難歲月終未收復緣大軍之行糧車甲乘動彌百里敵騎輕捷邀擊前後乘風揚沙一日數出進不可前退不可

息水泉不得飲沙漠無所獲此所以無功而有患也况  
今承平歲久中原無宿將精兵一旦興深入之謀擊難  
制之敵臣謂國之安危未可知也然則漢唐之時能拓  
疆萬里者蓋當時授任與今不同既委之以兵又與之  
稅賦而不求速效故養猛士延謀客日練月計以待其  
隙進不俟朝廷之命退不觀有司之責觀便乘勝如李  
牧之守邊可謂善破敵者惟陛下深計而緩圖之

乞救濟陝西饑民

前人



臣等竊見陝西永興軍同耀華州陝府等處今夏災旱  
得雨最晚民間秋稼甚無所望官中倉廩亦無積貯若  
不作擘畫即百姓大段流移殍亡者衆兼軍食闕絕臨  
時轉運不及臣等欲乞朝廷速降指揮委本路都轉運  
使孫沔速相度上件州軍向去救濟饑民及辦給軍食  
有何次第如難為擘畫即便於黃河內搬輦自京以來  
斛斗往彼應副仍速行相度沿路如何計綱即不至艱  
阻事狀聞奏候到乞朝廷早賜施行

請權罷陝西州軍科率

包拯

一鳳翔府斜谷造船務每年造六百料額船六百隻方木物料等自來分擘與秦隴鳳翔府諸處採買應付慶厯六年七年材料等共三十二萬見欠七萬有零慶厯八年材料等共二十一萬七千有零全欠一斜谷務又打造咸陽陝府橋脚船四十四隻合用材料共三萬一千有零見配買次一修河樁樑共四十五萬一千六百五十二條係七州科買一上京材木共九萬三千一百

五條各係大料木植十四州科買一採斫澶州河中府  
纜索竹一百五十萬三千八百二十竿見差人司竹監  
斫次一買上供肉羊兔千口係九州軍一買紫草一  
萬觔係十州軍一買紅花四千觔係六州軍右具如前  
臣勘會鳳翔府造船場每年額船六百隻其方木料并  
是本府并隴州量支官錢收買及於秦州採斫所差衙  
前例各賠錢一二千貫前後人戶破蕩家產不少每戶  
錮身者不下三兩人經年未得了當時准三司牒買修

河椿楸四十三萬餘條亦於永興等七州軍配買比之  
常歲多兩倍已上并河中府澶州要纜索竹一百五十  
萬竿見差人司竹監斫次今又准三司牒採買上件材  
木九萬三千條有零亦是分配永興等十四州收買緣  
並係大料木植只是秦州出產又聞深入番界採斫至  
難其餘不產州軍須至差衙前分買况陝西州軍一年  
之內三五次各是大段科配兼又錢法改更之後民間  
即目大段不易若稍不行寬恤則疲困之民無保全之

望雖詳省中書劄子住九年十年科買又只聞說肉羊  
紫草紅花之類並是小可物色亦易為應付所有逐年  
買造船場材木物料及樁橛等最為大害乞賜詳酌指  
揮權與蠲免

請罷同州韓城冶戶

前人

臣近聞同州韓城縣鐵冶務自來定占七百餘戶內二  
百餘戶厚有物力比見克里正人戶並各高強只以冶  
戶為名經今五十餘年影占州縣諸般差役其冶戶內

係第一等者每戶逐年共給冶務諸般所出錢不過三貫文外更別無所費況官中所得鐵貨只及十餘萬觔仍官支買炭并工匠錢三百餘貫更差專監使臣一員兼體問得本縣人戶以冶務全占却上等力役及致下等人戶差役頻併供應不前若將上件鐵數據等第均在本縣人戶上每約納官鐵歲不過十觔至二三十觔況本處見賣每觔價錢二十四五文每戶歲納官鐵約費三五百文雖自來官禁烹煉彼中私賣甚多令百姓

取便烹煉必然鐵價轉下兼令赴本縣送納於民至便  
又減省得監官一員只令本縣令佐專管給納仍得二  
百餘戶兼充重難役次頗甚均濟臣在任日方欲行遣  
屬以移任欲乞下本路轉運司選差清幹官員往彼相  
度施行

論夏人納鹽易茶

前人

臣伏見西虜再遣楊守素詣闕請命而朝旨方議納其  
誠款此亦安民禦邊之長策也風聞道路云元昊欲歲

納青鹽貿易茶貨然未審虛實緣元昊數州之地財用所出並仰給於青鹽自用兵以來沿邊嚴行禁約者乃困賊之一計爾今若許以歲進數萬石必恐禁法漸弛奸謀益熾不惟侵奪解鹽課利亦慮浸成大敝關防或未能制若稍行捉捕則棄前恩結後怨此亦必然之勢也議者復欲令運於關東支用或許客人裨販則又不免配率車乘轉成騷擾固朝廷所宜慎重此舉如不獲已則不若於前來許賜帛繒茶貨數量與增加亦可以



弭亡厭之求魚此劇賊猖狂難保沿邊塞柵備禦之具亦不可少懈

論麟州事宜劄子

歐陽修

臣昨奉聖旨至河東與明鎬商量麟州事緣臣未到間鎬已先有奏議尋再準樞密院劄子備錄鎬等所奏令臣更切同共從長相度臣遂親至河外相度利害與明鎬等再行商議乞那減兵馬人數可以粗減兵費已具連署奏聞此外臣別有短見合盡條陳其利害措置之

說列為四議如後 一曰辨衆說臣竊詳前後臣僚起請其說有四或欲廢為寨名或欲移近河次或欲抽兵馬以減省饋運或欲添城堡以招輯蕃漢然廢為寨而不能減兵則不若不廢苟能減兵而省費則何害為州其城堡堅完地形高峻乃是天設之險可守而不可攻其至黃河與府州各纔百餘里若徙之河次不過移得五七十里之近而棄易守難攻之天險以此而言移廢二說未見其可至如抽減兵馬誠是邊議之一端然兵

冗不獨麟州大弊乃在五寨若只減麟州而不減五寨  
與不減同凡招輯蕃漢之民最為實邊之本然非朝廷  
一時可自為必須委付邊臣許其久任漸推恩信不限  
歲年使得失不繫於朝廷之急而營緝如其家事之專  
方可收其遠效非二年一替之吏所能為也臣謂減兵  
添堡之說近之而未得其要 二曰較存廢今河外之  
兵除分休外尚及二萬大抵盡河東二十州軍以贍二  
州五寨為河外數百邊戶而竭數百萬民財賊雖不來

吾已自困使賊得不戰疲人之策而我有殘民斂怨之勞以此而思則似可廢然未知可存之利今二州五寨雖云空守無人之境然賊亦未敢據吾地是尚能斥賊於二三百里外若麟州一議移廢則五寨勢亦難存兀爾府州便為孤壘而自守不暇是賊可以入據我城堡耕牧我土田夾河對岸為其巢穴今賊在數百里外沿河尚費於防秋若使夾岸相望則泛舟踐水終歲常憂寇至沿河內郡盡為邊戍以此而慮則不可不存然須

得存之之術 三曰減寨卒臣勘會慶厯三年一年用  
度麟州用糧七萬餘石草二十一萬餘束五寨用糧一  
十四萬餘石草四十餘萬束其費倍於麟州於一百二  
十五里之地列此五寨除分兵戢泊外尚有七千五百  
人別用二千五百人負糧又有井忻等十州軍百姓輸  
納外及商旅入中往來其冗長勞費不可勝言逐寨不  
過三五十騎巡綽伏路其餘坐無所為蓋初建五寨之  
時本不如此寨兵各有定數建寧置一千五百人其餘

四寨各止三百至五百今之冗數并是後來增添臣謂  
今事宜稍緩不比建寨之初然且約舊數尚不至冗費  
臣請只於建寧留一千人置一都巡檢其鎮川中堠百  
勝三寨各留五百其餘寨兵所減者屯於清寨堡以一  
都巡檢領之緣此堡最在近東隔河便是保德軍屯兵  
可以就保德軍請糧則不煩輸運過河供饋若平日路  
人宿食諸寨五百之卒巡緝有餘或些小賊馬則建寧  
之兵可以禦捍若賊數稍多則清寨之兵不失應援蓋

都不去百里之內非是減兵但那移就食而已如此則河外省費民力可紓 四曰委土豪今議麟州者存之則困河東棄之則失河外若欲兩全而不失莫若擇一土豪委之自守麟州堅險與兵二千其守足矣況所謂土豪者乃其材勇獨出一方威名既著敵所畏服又能諳敵情偽凡於戰守不至乖謀若委以一州則自視州如家繫已休戚其戰自勇其守自堅又其既是土人與其風俗情接人賴其勇亦喜附之則蕃漢之民可使漸

自招集是外能捍賊而戰守內可輯民以實邊省費減兵無所不便比於命吏而往凡事仰給於朝廷利害百倍也必用土豪非王吉不可吉見在建寧寨蕃漢依吉而耕於寨側者已三百家其材勇則素已知名况其官序自可知州一二年間視其後効苟能善守則可世任之使長為捍邊之守右臣所陳乃是大計伏望聖慈特賜裁擇若可以施行則紓民減費之事容臣續具條列取進止



通進司上皇帝書

節

前人

臣聞今為西計者皆患漕運之不通臣以為但未求之耳今京師在汴漕運不西而人之習見者遂以為不能西不知秦漢隋唐其都在雍則天下之物皆可致之西也山川地形非有變易於古其路皆在昔人可行今人胡為而不可漢初歲漕山東粟數十萬石是時運路未修其漕尚少其後武帝益修渭渠至漕百餘萬石隋文帝時沿水為倉轉相運置而關東汾晉之粟皆至渭南

運物最多其遺倉之迹往往皆在然皆尚有三門之險  
自唐裴耀卿又尋隋迹於三門東西置倉開山十八里  
爲陸運以避其險卒汴河而入渭當時歲運不減二三  
百萬石其後劉晏遵耀卿之路悉漕江淮之米以實關  
西後世言能經財利而善漕運者耀卿與晏爲首今江  
淮之米歲入於汴者六百萬石誠能分給關西得一二  
百萬石足矣今兵之食汴漕者出戍甚衆有司不惜百  
萬之粟分而及之其患者三門阻其中爾今宜浚治汴

渠使歲運不阻然後按求耀卿之迹不憚十許里陸運之勞則河漕通而物可致且紓關西之困使古無法今有可爲尚當爲之況昔人行之而未遠今人行之而豈難哉耀卿與宴初理漕時其得尚少至其末年所入十倍是可久之法明矣此水運之利也臣聞漢高祖之入秦不由東關而道南陽過酈析而入武關曹操等起兵誅董卓亦欲自南陽道丹析而入長安是時張濟又自長安出武關奔南陽則自古用兵往來之徑也臣嘗

至南陽問其遺老云自鄧西北至永興六七百里今小  
商賈往往行之初漢高入關其兵十萬夫能容十萬兵  
之路宜不甚狹而險也但自洛陽為都行者皆趨東關  
其路久而遂廢今能按求而通之則武昌漢陽郢復襄  
陽梁洋金商均房光化沿漢之地十一二州之物皆可  
漕而頓之南陽自南陽為輕車人輦而遞之募置遞兵  
為十五六鋪則十餘州之物日日入關而不絕沿漢之  
地山多美木近漢之民仰足而有餘以造舟車甚不難

也前日陛下深恤有司之勤內賜禁錢數十萬以供西  
用而道路艱遠輦運逾年不能畢至至於運裝輸送多  
苦秋霖邊州已寒冬服尚滯於路其艱如此夫使州縣  
綱吏遠輸京師轉冒艱滯然後得西豈若較南陽之旁  
郡度其道里入於武關與至京師遠近等者與其尤近  
者皆使直輸於關西京師之用有不足則以禁帑出賜  
有司者代而克用其迂曲簡直利害較然矣此陸運之  
利也

論復置豐州劄子

司馬光

臣等伏見國家復置豐州故城仍差人知州此誠河西險要之地修之甚便然其地勢孤絕外迫寇境鄰者王氏知州之時所部蕃族甚衆有永安來遠保寧三寨皆以蕃族守之慶厯初拓跋元昊攻陷州城州民及三寨蕃族盡為所虜掃地無遺今州城之中但有丘墟瓦礫環城數十里皆草莽林麓而已若建以為州則須復設外寨備置官吏廣屯兵馬多積芻糧皆應調發內地之

民以奉之勞費甚大此所謂徇虛名而受實弊也頃年朝廷欲修豐州城河東經畧司嫌其單外廼於其南數十里築永寧堡其地窪下居兩山間疏惡難守令既修豐州則永寧堡深在腹內無所復用臣等以為不若遷永寧堡於豐州故城其兵馬芻糧不須增益但擇使臣有材畧者使守之不必假以知州之名仍召募蕃漢之民使墾闢近城之田俟民物繁庶皆如其舊然後升以為州亦未晚也取進止

言陳述古劄子

治平二年正月

前人

臣竊聞陝西都轉運使陳述古昨因巡邊妄奏稱邊鄙  
寧靜不足為慮後因權涇原路經畧司事聞副總管劉  
几稱西人點集將謀入寇請出兵防禦述古恐與前奏  
相違因此怒几奏稱不協軍情張皇生事擅移几知鳳  
翔府數日之間西人果大舉犯邊殺掠弓箭手及熟戶  
蕃部述古亦不即時發兵救援致陷沒數千戶近者雖  
知朝廷已差臺官勘述古罪狀然竊聞所坐止於擅移



劉几及奏狀有不實之處若以文吏議之罪不至重若  
以國計言之為害實深何則國家承平日久人不習戰  
雖屯戍之兵亦臨敵難用唯弓箭手及熟戶蕃部皆生  
長邊陲習山川道路知西人情偽材氣勇悍不懼戰鬪  
從來國家賴之以為藩蔽今迷古知西人欲來侵擾而  
自避讎覆之辜順成欺罔之謀抑遏將官不許救護遂  
以數千戶生民委於虎口使父子流離骨肉塗炭豈惟  
已陷沒者深可哀痛臣恐自今以後諸路弓箭手皆不

敢於極邊居止熟戶蕃部皆有叛國從賊之心以此觀之其害豈小哉况述古出於門蔭材氣庸鄙自歷官以來所至之處縱恣胃臆殘虐吏民不顧憲典輕侮王命驕暴狠狡天下共知屢會坐事黜降旋復收用叨竊名位一朝至此誠過其分量故天奪之魄舉措乖謬駭人視聽臨敗民命挫辱國威內外之人無不憤疾臣聞舜誅四凶而天下服如述古平生所為亦可以謂之凶人矣陛下縱不欲明加斧鉞以謝邊民亦當投之荒裔以

禦魑魅庶使封疆之臣少加警懼取進止

乞罷刺陝西義勇第四劄子

前人

臣近日已三次上言乞罷刺陝西義勇事未蒙朝廷采納臣欲止而不言則不忍坐視一路之民橫受困苦而自圖一身之安又恐遷延日久則無及於事是以不敢避斧鉞之誅繼上封奏為陛下極陳其害臣比日以來熟思此事誠於民有世世之害於國無分毫之利何謂於民有世世之害臣竊見河北陝西河東自景祐以前

本無義勇凡州縣諸般色役並是上有物力戶人支當其鄉村下等人戶除二稅之外更無大段差徭自非大饑之歲則溫衣飽食父子兄弟熙熙相樂自寶元慶厯之間朝廷因趙元昊叛亂契丹壓境遂於三路鄉村人戶之中不問貧富等第但有三丁之家即揀一丁充鄉弓手及強壯其時西邊事宜尤急尋將陝西一路鄉弓手盡刺面充保捷指揮正軍其河北河東事宜稍緩遂只將鄉弓手及強壯刺手背充義勇自此三路之人

始騷然愁苦矣其河北河東之民比於陝西雖免離家  
去鄉戍邊死敵之患然一刺手背之後則終身拘綴或  
欲遠出幹事糴賤販貴或遇水旱凶荒欲分房逐熟或  
典賣田產欲浮遊作客皆慮官中非時點集不敢東西  
又當差點之際州縣之吏寧無乞覓教閱之時人員教  
頭寧無斂掠是於常時色役之外添此一種科徭也若  
果如議者之言無害於民則民皆樂從官中何必更刺  
其手背以防逃竄乎以此觀之義勇為害於兩路之民

已可知矣況陝西於慶歷年中民家已各喪一丁刺充保捷流落不歸今又取其次丁刺充義勇不亦甚乎朝廷近年分命朝臣徧往諸路減省諸般色役至於弓手壯兵解子驛子之類州縣所不可闕者亦皆減放謂之寬恤民力今乃無故一旦剝一路之民十有餘萬以為義勇何朝廷愛之於前而忍之於後憫之於小而忘之於大乎且今日既籍之後則州縣義勇皆有常數每有逃亡病死州縣必隨而補之則義勇之身既羈縻以至老

死而子孫若有進丁又不免刺為義勇是使陝西之民  
子子孫孫常有三分之一為兵也臣故曰於民有世世  
之害也何謂於國無分毫之利太祖太宗之時未有義  
勇至於正軍亦不及今日十分之一然而太祖取荆湖  
平西川下廣南克江南太宗取兩浙克河東一統天下  
若振槁拾遺此豈義勇之力也哉蓋由民政修治軍令  
嚴肅將帥得人士卒精練故也康定慶厯之間趙元昊  
負累朝厚恩無故逆命侮慢不恭侵犯邊境朝廷竭天

下之力以奉邊鄙劉平任福葛懷敏之師相繼覆沒士卒死者動以萬數正軍不足益以鄉兵外府不足繼以內帑民力困極財物殫盡終不能出一旅之衆涉甌脫之地以討其罪而不免含垢忍恥假以寵名誘以重賂僅得無事當是之時三路新置鄉兵共數十萬何嘗得一人之力乎以此觀之義勇無用亦可知矣賈誼有言曰前車覆後車戒康定慶厯禦戎之策國家當永以為戒今乃一一檢當時體例而行之是後車又將覆也有



難臣者必曰古之兵皆出民間豈民兵可用於古而不可用於今乎臣則對曰三代之時用井田之法以出土卒車馬居則為比閭族黨州鄉行則為伍兩卒旅師軍為之長者皆鄉大夫也唐初府兵各有營府不屬州縣有將軍郎將折衝果毅以相統攝是以令下之日數萬之衆可以立具無敢逃亡避匿者以其綱紀素備故也今鄉兵則不然雖有軍員節級之名皆其鄉黨族姻平居相與拍肩把袂飲博鬪毆之人非如正軍有階級上

下之嚴也若安寧無事之時州縣聚集教閱則亦有行陣旗鼓關弓彊弩坐作叫噪真如可以戰敵者彼若聞胡寇大入邊兵已敗邊城不守胡騎殺掠蹂踐卷地而來則莫不迎望風聲奔波迸散其軍員節級將鳥伏鼠竄自救之不暇豈有一人能為縣官率士卒而待寇乎以臣觀之此正如兒戲而已安有為國家計驚騷一路之民使之破家失業而為兒戲之事乎臣故曰於國無分毫之利也凡此利害之明有如白黑伏望陛下不以

臣愚賤而忽其言少留聽察其刺陝西義勇事早賜寢  
罷則一方幸甚取進止

諫征西疏

熙寧四年正月

前人

臣以不材誤承朝廷委用待罪長安兼領一路十州兵  
民大柄朝辭之日伏蒙陛下面諭凡邊防事機及朝廷  
得失有所聞見令一一奏聞臣受命以來且愧且懼所  
愧者聖恩深厚責任至重所懼者智識淺短無以堪稱  
夙夜疚心不敢寧居臣自入境以來見流移之民道路

相望詢訪閭里皆云今夏大旱禾苗枯瘁河渭以北絕  
無所收獨南山下稍有所存而入秋霖雨經月不霽禾  
雖有穗往往無實雖有實往往無米雖有米率皆細黑  
一斗之粟舂簸之後不過得米三四升穀價踊貴民間  
累年困於科調素無積蓄不能相贍以此須至分房減  
口就食西京襄鄧商虢等州或傭賃客作或燒炭採薪  
或乞匄剽竊以度朝夕當此之際國家惟宜鎮之以靜  
省息諸事減節用度則租稅自輕徭役自少逋負自寬

科率自止四患既除民力自足民財自饒閭里自安流  
亡自還固不待陛下憂勤於上宰相劬勞於下然後人  
人得其所也苟或不然國家雖欲輕租稅寬逋負其所  
費之財何由可得雖欲少徭役止科率其所營之事何  
由可成四患不除雖日下恩澤之詔民猶不免於流移  
轉死也蓋欲止沸者莫若絕薪欲安民者莫若省事此  
目前之驗非難知也臣到官以來伏見朝廷及宣撫等  
司指揮分義勇作四番欲令以次於緣邊戍守選諸軍

驍銳及募閭里惡少以為奇兵造乾糧皸飯布囊力車以備餽運悉取歲賜東常之物散給緣邊諸路又竭內地府庫甲兵財物以助之且以永興一路言之所發人馬甲八千副錢九萬貫銀二萬三千兩銀盞六千枚其餘細瑣之物不可勝數動皆迫以軍期上下相驅急於星火官吏狼狽下民驚疑皆云國家將以今春大舉六師長驅深入以討秉常之罪臣以疎賤不得預聞廟堂之議未知茲事為虛為實昨者親承德音以方今邊計

唯宜謹嚴守備俟其入寇則堅壁清野使之來無所得  
兵疲食盡可以坐收其弊臣退而思念聖謀高遠深得  
王者御戎狄之道實天下之福及到關中乃見凡百處  
置皆為出征調度臣不知有司在外不論聖意以致有  
此張皇將陛下默運神算不令愚賤之臣得聞其實也  
臣不勝惶恐晝則忘食夜則廢寢心寒股慄竊為陛下  
危之夫兵者凶器聖人不得已而用之自古以來國家  
富彊將良卒精因人主好戰不已以致危亂者多矣况

今公私困竭將愚卒懦乃欲驅之塞外以捕狡悍之虜其無功必矣豈惟無功兼後患甚多不可盡言也若朝廷初無出征之意則何為坐散府庫之財疲生民之力訖無分毫之事萬一將來虜騎入寇府庫已竭民力已困將何以禦之臣先任御史中丞日朝廷將興綏州之役臣會上言國家先當舉百職修庶政安百姓實倉庫選將帥立軍法練士卒精器械八事皆備然後可以征伐四夷今此八事未有一者勝於曩時而況關中饑饉



十室九空為盜賊者紛紛已多縣官倉庫之積所餘無幾乃欲輕動大衆橫挑猛敵此臣之所大懼也或者又云國家未討秉常先欲試兵誅一小族若果如此猶為不可何則今者竭關中之財力大興師衆乃捨有罪之彊寇誅無辜之小種勝之不武不勝為笑將無以復號令戎狄矣此二策者皆為不可伏望陛下深鑒安危之機消之於未萌救之於未形速下明詔撫諭關中之民以朝廷不為出征之計其義勇更不分番於緣邊戍守

亦不選募奇兵凡諸調發為餽運之計者悉令停罷愛惜內地倉庫之儲以備春深調救饑窮之人如此豈惟生民之幸亦社稷之福也

條列陝西利害疏

九條  
選四

范純仁

臣前次上殿親奉德音以臣曾任陝西令臣具陝西利害聞奏臣才識淺拙慚無長策上裨聖猷謹具管見條列如左一陝西有沙苑等處監牧草地七八千頃自來養馬別無增息虛占良田今來陝西四塞之地不通漕

運若得彼中自出穀食則屯聚大兵易為供贍今乞罷  
陝西監收將上件地開為營田募民耕種一頃歲收公  
私無慮二百石則歲可得一百五十餘萬石以助關右  
兵民之食為利不細其所得芻糈自可秣馬以助軍計  
一方今陝西苦於城寨太多及冗兵冗官為害又朝廷  
時有試中武藝等人並與班行殿侍送沿邊指使城寨  
多則分却兵糧冗官多則坐耗邊用及班行等各懼替  
歸本班難得差遣故人人皆思僥倖以為身謀交構邊

事無所不至今乞將閑慢城寨冗官冗兵檢會臣前來  
劄子委帥臣監司減省其試中武藝等人即乞且送陝  
西內地易得糧草處差使緩急旋行勾抽不惟惜得軍  
儲兼免妄生邊事一解鹽之法是為邊備根本近因法  
壞朝廷雖曾遣張靖體量亦不能深究利病朝廷以未  
見弊源重於更制臣恐三二年間糧草亦更虧少今乞  
檢會臣前來劄子令轉運司通管公共講求長久之法  
庶幾范祥時糧草之數漸可復補一邊人好食西界青

鹽雖嚴禁所不能止販者多是邊上強人事敗悉遭遠配邊上強人漸少甚非中國之利今乞於沿邊置榷場以茶并雜貨博易青鹽盡收入官與解鹽同賣仍通入解鹽課額其合用茶乞自朝廷賜與其他雜貨即令解鹽司管認如此則不惟省刑愛人亦可以固我心息邊患

乞追贈張載疏

張舜民

臣伏視鳳翔府橫渠鎮居住故崇文院校書張載學際

天人誠動金石義之所在白亦可蹈心有不厭萬鍾何  
加口如不能言體若不勝衣議論感激凜如秋霜雖萬  
軍之將不足言其勇也平居與人言退然若不知讀書  
者坐而講貫剖判是非談辨如流雖滔滔江漢不足方  
其廣也著書萬言名為正蒙陰陽變化之端仁義道德  
之理死生性命之分治亂國家之經罔不究通方之前人  
其孟軻揚雄之流乎如荀况輩不足望於載也關中學  
者靡然就之謂之橫渠先生一登其門言行皆知孝悌

仁義有如夙成雖去載千里之遠十年之久不敢一蹈  
非義常若載之臨其前後左右也自此西土學者灑然  
知先聖賢之學乃知鄉者誦說之富組繡之文特小道  
爾在熙寧中累薦朝廷召至闕下授以崇文院校書未  
幾以疾辭歸熙寧末年再至闕下神宗方將任用使行  
其所言其疾再作謁告西歸死於道路當時議者以謂  
載身逢明天子緣飾禮文修明治具之時再至朝廷竟  
不能伸其一言以終此載之短薄則不幸也有士如此

當年不能興舉舉於老疾垂死之時治國者亦不得無  
慊然於心也載之死於今十有五年中外臣僚猶錄其  
平生以言於朝廷者畧以十數或乞賜田或錄其子或  
乞降謚然天聽高邈未蒙響答今載止有一妻一子衣  
食不足寄託親友日來月往人情憤煩饑寒之憂其勢  
甚迫若不上告朝廷何所赴愬且君子平日修身謹行  
固不為其身之與子孫也朝廷褒賢錄善豈特為其賢  
者之後乎如孟軻荀卿揚雄於今千有餘年學者徒能



讀誦其書而已至於禮貌寂寥孰肯來括本朝一旦列  
之封爵血食廟堂使後世觀之賢於孟軻荀卿揚雄乎  
賢於本朝乎故知臣今日之言非為載也伏乞朝廷檢  
會累次臣僚奏陳於錄子賜田追謚三者之間凡可以  
厚載者舉一而足庶使褒賢之典獨見於本朝為善之  
風不墜於今日

乞選親賢為京兆牧

唐重

關中百二之勢控制陝西六路捍蔽川陝四路今蒲解

失守與敵為隣關中固則可保秦蜀十路無虞緣逐路  
帥守監司各有占護不相通融昨范致虛會合勤王之  
師非不竭力而將帥各自為謀不聽節制乞選宗親賢  
明者充京兆牧或置元帥府令總管秦蜀十道兵馬以  
便宜從事應帥守監司並聽節制緩急則合諸道之兵  
以衛社稷不惟可以禦敵亦可以救郡縣瓦解之失矣

請復把胡魯陝西行省

金 兀爾佳德新

臣伏見知河中府把胡魯廉直忠孝公家之利知無不

為實朝廷之良臣也去歲兵入延安胡魯遣將調兵城  
賴以完不為無功今哈達敏珠爾各授世封而胡魯改知  
河中府竊謂方今用人之時使謀畧之臣不獲展力緩  
急或失事機誠宜復行省之任使與承裔共守京兆令  
合達買住捍禦延安以藩衛河南則內外安矣

論鹽法

元特穆爾

近蒙委巡歷奉元東道至元元年各州縣戶口額辦鹽  
課其陝西運司官不思轉運之方每年豫期差人分道

齎引遍散州縣甫及旬月杖限追鈔不問民之無有竊照諸處運司之例皆運官召商發賣惟陝西等處鹽司近年散於民戶且如陝西行省食鹽之戶該辦課二十萬三千一百六十四錠有餘於內鞏昌延安等處認定課鈔一萬六千二百七十一錠慶陽環州鳳翔興元等處歲辦課一萬七千九百八十五錠其餘課鈔先因關陝旱饑民多流亡准中書省咨至順三年鹽課十分為率減免四分於今三載尚有逋負蓋因戶口凋殘亡亡

八九縱或有復業者家產已空邇來歲頗豐收而物價甚賤得鈔為艱本司官皆勒有司徵辦無分高下一槩給散少者不下二三引每引收價銀三錠富家無以應辦貧民安能措畫糶終歲之糧不酌一引之價緩則輸息而借貸急則典鬻妻子縱引目到手力窘不能自運止從各處鹽商勒價收買舊債未償新引又至民力有限官賦無窮又寧夏所產韋紅鹽池不辦課程除鞏昌等處循例認納乾課從便食用外其池隣接陝西環州

百餘里紅鹽味甘而價賤解鹽味苦而價貴百姓私相販易不可禁約以此參詳河東鹽池除撈鹽戶口食鹽外辦課引數今後宜從運官設法募商興販但遇行鹽之數諸人毋得侵擾韋紅鹽法運司每歲分輸官吏監視聽民採取立法抽分依例發賣每引收價鈔三錠自黃河以西從民食用通辦運司元額課鈔因而夾帶至黃河東南者同私鹽法罪之陝西興販解鹽者不禁如此庶望官民兩便而課亦無虧矣

請陝西兼食韋紅鹽疏

胡通

陝西百姓許食解鹽近脫荒歉流移漸復正宜安輯而鹽吏不察民瘼止以恢辦為名不論貧富散引收課或納錢入官動經歲月猶未得鹽蓋因地遠脚力艱澁今後若因大河以東之民分定課程買食解鹽其以西之民計口攤課任食韋紅之鹽則官不被擾民無蕩產之禍矣且解鹽結之於風韋紅之鹽產之於地東鹽味苦西鹽味甘又豈肯舍其美而就其惡乎使陝西百姓一槩均

攤解鹽之課合食韋紅之鹽則鹽吏免巡禁之勞矣

請從祀謚法疏

節

明 張邦俊

臣竊惟國於天地必有與立大典是也大典者何則從祀與謚法是也是故生明聖賢之道歿分俎豆之光此從祀之典為理學名臣而設也生竭報國之忠歿蒙易名之榮此謚法之典為盡忠名臣而設也兩者皆重典也典重則馭世者不得屑越以輕之固不可濫有所予使鉅典被於匪人以開天下徼倖之門亦不可靳於所



予使潛德沉而不耀以阻君子為善之路總之期於人不負典典不負人以合於至當之歸而已臣關中人也其先誥有當於兩大典者臣得於師友之所聞揚記載之所考稽業已知之稔矣臣生於先哲表樹之鄉而不為前誥以播揚之是臣有負於臣鄉之先達也臣當此講求大典之時而不求其人以克之實之是臣有負於國家之盛典也用是輒敢效區區之愚舉其所知為皇上陳之中有應堪從祀者臣僅得一人焉呂柟是已關

中又有應堪補謚者除鼎彝重望朝野具瞻如原任都御史溫純方在新議自當不吝榮施以表全德臣亦不敢混而入於補謚之例也其應補謚者雍泰諸臣是已臣謹錄其生平大槩人各一欸開載於後以便睿覽應從祀者原任南京禮部右侍郎謚文簡呂枏應補謚者原任南京戶部尚書雍泰原任總制三邊兵部尚書魏學曾原任吏部左侍郎盛納原任南京吏部尚書兼學士王用賓原任南京光祿寺卿馬理原任南京右都御

史胡嘉謨原任吏科給事中張原原任兵科給事中裴  
紹宗原任兵部左侍郎鄒應龍原任南京國子監祭酒  
王維楨以上或繼往開來續千聖之道脈或奉公潔已  
立萬年之臣標或折檻殿廷共仰朝陽鳴鳳或抽毫藝  
苑咸誇瑞世人龍勲業與日月爭光芳名垂乾坤不朽  
均之不愧大典而為盛世增輝者也

備陳災變疏

節

馬懋才

臣奉差事竣道經臣鄉延安府自去歲一年無雨草木

卷八十六  
枯焦八九月間民爭採山間蓬草而食其粒類糠皮其  
味苦而澁食之僅可延以不死至十月以後而蓬盡矣  
則剥樹皮而食諸樹惟榆樹差善雜他樹皮以為食亦  
可稍緩其死殆年終而樹皮又盡矣則又掘山中石塊  
而食其石名青葉味腥而膩少食輒飽不數日則腹脹  
下墜而死民有不甘於食石以死者始相聚為盜而一  
二稍有積貯之民遂為所劫而搶掠無遺矣有司亦不  
能禁治間有獲者亦恬不知畏且曰死於饑與死於盜

等耳與其坐而餓死何若為盜而死猶得為飽死鬼也  
最可憫者如安塞城西有糞場一處每晨必棄二三嬰  
兒於其中有涕泣者有叫號者有呼其父母者有食其  
糞土者至次晨則所棄之子已無一而又有棄之者矣  
更可異者童穉輩及獨行者一出城外更無踪影後見  
門外之人炊人骨以為薪煮人肉以為食始知前之人  
皆為其所食而食人之人亦不數日面目赤腫內發燥  
熱而死矣於是死者枕藉臭氣薰天縣城外掘數坑每

坑可容數百人用以掩其遺骸臣來之時已滿三坑有餘而數里以外不及掩者又不知其幾矣小縣如此大縣可知一處如此他處可知幸有撫臣岳和聲拮据獨苦以弭盜而兼之拯救捐俸煮粥以為之率而道府州縣各有所施以拯濟然粥有限而饑者無窮杯水車薪其何能濟乎臣仰窺皇上宵衣旰食無念不為民生慮無刻不為安民計若不急救此一方遺黎恐死者死矣為盜者為盜矣見有之民旦夕莫必其命西北疆域幾成

無人之區矣伏祈勅下該部從長計議或發賑濟或蠲  
加派或姑減其分數或緩待之秋成惟在皇上急為渙  
汗耳然臣猶有說焉國初每十戶編為一甲十甲編為  
一里今之里甲寥落戶口蕭條已不復如其初矣況當  
九死一生之際即不蠲不減民亦有呼之而不應者官  
司束於功令之嚴不得不嚴為催科如一戶止有一二  
人勢必令此一二人而賠一戶之錢糧一里止有一二  
戶勢必令此一二戶而賠一甲之錢糧等而上之一里

一縣無不皆然則見在之民止有抱恨而逃飄流異地  
棲泊無依恒產既亡懷資易盡夢斷鄉關之路魂消溝  
壑之填又安得不相率而為盜者乎此處逃之於彼彼  
處復逃之於此轉相逃則轉相為盜此盜之所以遍秦  
中也臣目覩此光景心幾痛裂知皇上亦必惻然動念  
當事諸臣自有籌畫然蚤一日則救數千萬之生靈遲  
一日則斃數千萬之性命惟皇上速加之意也大抵總  
秦地而言慶陽延安以北饑荒至十分之極而盜賊則



稍次之西安漢中以下盜賊至十分之極而饑荒則稍次之緣係異常災變從來所未經見者不敢不據實以聞

邊地有司減俸行取疏

吳姓

臣於去年六月具縣令親民之官殘邑尤宜得人一疏奉有兵荒邊地有司果著有實效准減俸行取以示鼓勵之旨仰見我皇上體恤邊吏如此其至也臣時以此勸勉有司其不肖者自為暴棄天地雖大不能施雨

露之恩則亦已耳其賢能者竭蹶黽勉幸有成效而臣  
差將竣出關有日矣不及此時遵奉溫綸申明前說不  
但有負諸臣亦且負皇上體恤邊吏德意是以惴惴不  
敢自寧臣謹列諸有司之狀以暢言減俸之旨可乎延  
慶之為吏者大荒四年羣盜如毛四野焚燬一望蕭條  
止數孤城壁立而城以內多者千家少者數百家田地  
荒蕪不治課稅既停緡算復絕官無俸錢役無工食其  
賢者自辦資斧以餬其口子然一身日抱印牘夜宿雉

堞在我馬烽火之中與鳩形鵠面為伍非獨無居官之榮亦且鮮生人之樂如中部保安安塞合水等縣煨燼之餘縣官棲止民房出騎款段力不能具與臺其艱苦至此即令廉如伯夷誰為蜚聲譽於當道之前者不幸寇至奸從內應命危如綫即或僅以身免而國法俱在誰敢徇之不逮繫司敗則戍伍鬼薪狼狽一身窮歸無路臣每目擊心恫為之隕涕同為朝廷司牧綰半通之綬受一命之寄而苦樂異趣一至於此今二三賢能幹

濟之吏從千苦萬難中竭力支撐保障危城可不謂循良卓軌哉而乃不得與腹裏有司爭一日之遇豈不可為太息乎惟朝廷之上垂鑒異苦憫其賢勞加以不次之擢開以減俸之例使知今日盡瘁異日尚有清華一路庶鼓舞忘倦以爭自濯褻勉收後效不然彼處安席撫者坐致美遷此茹荼食苦者久困枳棘徒以灰豪傑之心而令海內之士裹足不入秦耳臣以為宜勅下吏部覆議遵照明旨今後兵荒邊地如延安慶陽等府各

州縣凡知推不論科貢但有實效應行取者減俸一年以三年四月為期即與截取考選科道部屬其同知知州等官以三年為滿即加優擢與以善地庶勞逸均而無獨賢之歎乎且不獨此也人皆視邊地為畏途故擇地而蹈者規避不前今知有減俸之例考選優擢之榮則賢者爭思奮勵於功名之路矣銓司知聖天子加意邊吏必多方遴選授以老練甲科精力孝廉而吏治從此一新收拾殘疆為生聚教訓之圖則保障之功循良

之績民生與封疆俱嘉賴之矣且有司仰承風旨勉勵  
服官有司即將百姓即兵固圉禦侮綢繆必力其考選  
而為言路也則虜賊情形封疆利害得以所見聞者條  
議入告不至遙揣懸度以拾紙上之譚其考選而在戶  
兵部者知糧芻虛實兵馬強弱將領勇怯及一切險隘  
防禦之術不致按圖循套以塞苟且之責而經濟事業  
亦舉從此出矣在朝廷特行一激勸之法而邊地已受  
無疆之福然則邊吏減俸之說豈第為諸有司計也哉

伏乞皇上垂念邊吏之苦特賜鼓舞非獨延慶也雖著  
為令行之各邊郡州縣可矣

公奏勦寇疏

衛胤文

四月以來流賊自蜀返漢分掠鳳西等府攻破平利洵  
陽白河紫陽鳳縣鎮安雒南永壽山陽同官興安州隴  
州麟遊汧陽涇州崇信隆德成縣漳縣兩當文縣秦安  
等州縣二十一處而衛所巡司驛遞尚不與焉此外城  
池雖未失而村鎮焚掠靡有孑遺者又不下百十餘處

與已失者無以異載在撫按疏揭中俱歷歷可按也近按臣傳永淳與臣手書云即今強賊無數盤踞邠乾鳳隴之間全望督師拯救而督臣自漢南至鳳翔所發兵馬俱為賊困標下兵馬止百三十名無兵可發蓋因一行招撫將原帶兵馬散者散矣止者止矣虛實盡在賊中故一舉而莫可制臣等讀之未畢心膽俱寒伏思流賊之用撫也在大勦之後彼勢屈而力窮將匍匐以乞命我乃寬一面網為招安計則可耳若我兵既微我將



既怯其視流賊也多寡既不相如強弱又甚相懸絕坐  
視殺掠萬狀竟爾莫展一籌不得已遍處招誘欲以撫  
之一著苟且結局彼流賊者當其就撫時則面撫而心  
叛迨其既撫後則旋撫而旋叛此臣鄉庫午辛未間當  
事諸臣用之而貽害無窮者今其可再試耶若再試之  
而仍然不效乃復朦朧推卸以欺我皇上至於地方將  
盡為賊有百姓盡為賊殺其禍安所底止哉嗟乎秦地  
皇上之版圖也秦民皇上之赤子也欲救秦疆非抹殺

撫之一字純用勦法不可欲用勦法非用大兵大餉不可祈念三秦今日景象萬分危急倘稍遲救援事將有不忍言者勅下督撫調發延寧甘固之兵委二三智勇大將合力夾勦至於前蒙皇上准留地方餉銀若其留者即可徵解夫豈無救急需臣等亦何事累章呼籲以煩聒天聽也奈三秦西自邠乾南自漢興北自涇陽三原遍地皆賊道路俱梗烟火絕斷文移不通田園廬舍變為丘墟將於何處覓餉乎並望或勅戶部或發帑金急

措三四十萬以濟軍費以責成功更乞責令巡按御史  
詳查失事地方的係何官責任功罪果否相準並查某  
處失陷在未招安前某處失陷在已招安後某處為受  
撫之賊某處為未受撫之賊或先激變而後焚劫或先  
焚劫而後激變塘報係何月日軍民果否相安據實回  
奏欽聽聖裁則撫與勦之利害昭然明白而流賊猶可  
減秦事猶可為矣

撫臣不宜數易疏

衛楨固

臣惟官必久任而後可以責成效蓋為恩足以洽人則人知慕威足以服人則人知畏凡官皆然而撫臣為尤甚撫臣有地方專責民情軍機皆其職掌一二月中能悉地方之利病乎能習兵將之耳目乎能知某地之險易能知某餉之措處乎勢不得不需之歲月臣鄉經兵荒之餘全藉賢撫臣曲盡經畫不謂當事者以傳舍置也丁啟睿後推王裕心矣纔告到任而輒換謂裕心不賢也推者何心謂裕心賢耶換者又何心皆令人不解

新撫汪喬年清足自立公足服人謂可藉手撫殘黎而  
又奪之去矣謂三邊為要地豈腹裏非要地乎謂喬年  
才大必邊方始展驥足三輔多事叛兵降寇勢亦岌岌  
獨不可見才乎謂改督使用之勦寇宛南密邇商雒能  
保寇不入秦乎謂一時乏才督撫之任原並重移撫就  
督將撫臣遂可輕乎喬年而後倏來倏轉又不知其幾  
變也司衡鑑者謂某人宜仗鉞一方某人宜總督軍務  
胸中應有多人而臨事周章滋議盈庭臣甚惑之且也

官屢易則人情囂熟功名者得營競以圖陞轉厭苦難  
者亦得別遷以遂規避最不便也已成之事臣不敢求  
易但祈皇上嚴飭該部於臣鄉撫缺必選才望素著者  
久任責成勿使秦之百姓疲於迎送秦之兵將漫無適  
從悞地方而褻官方也臣不勝激切待命之至

請本色入由單疏

本朝

李鵬鳴

臣鄉西安所屬錢糧舊例皆徵折色自

國初大兵駐省所需糧草取給於涇渭南北十六州

縣每年本折兼徵而由單所載止有折色原數無本色新額每徵本色其數目不預定也上司陸續檄催州縣節次派徵隨時價為低昂年年盈縮不同其間哀多益寡官吏雖能了然而百姓不知也究竟軍中所得芻糗未嘗溢額而民間輸納終難明晰朦混之弊恐不能免臣思駐防兵馬原有定數則糧草亦有定數既不以豐歉為增減安得以貴賤為多少乃不額定徵收而必游移為之豈良

法美意乎請

勅撫臣嚴檄藩司酌議估定米豆草束價值核實十六  
州縣原額地糧若干每糧一石每年應徵折色幾  
分為數若干應徵本色幾分為數若干將銀數與  
米豆草束之數逐款分列刊入由單仍於本戶名  
下註明應納細數使百姓預先明晰然後按數徵  
收可以杜吏胥混派之端可以清里排包攬之弊  
民力既裕軍需無悞矣



請會勦備餉第二疏

白如梅

秦豫兵馬會勦楚寇令楚中預備糧芻久已奉有  
俞旨前因該省督撫於部文到後又移咨令臣多撥興  
安民夫赴鄖運米事屬難行臣復具疏

上聞矣今於本年十二月初八日復准該督撫各移疏  
揭到臣臣閱疏中之言大槩有五總屬諉卸一云  
馬匹草料折銀三萬兩收貯鄖陽兵到房縣支領  
自賣一云各省官兵自有原帶餉乾隨帶進勦之

處預辦支給一云速撥秦豫民夫赴鄖負米一云  
房竹一通亦必須秦豫人夫協同背負一云興安  
等處糧餉有餘撥供出關之兵免楚省繞道之難  
臣就其說敢為

皇上細陳之秦豫長征之馬原需芻豆以資飽騰然到  
房縣然後支銀易買如地方荒殘無可買處支銀  
亦屬無用既有賣草賣料之家即可為供草供料  
之衆該省司道不言實備徒存折草料之空名未

云有濟也又云兵馬餉乾隨帶進勦之處預辦支給是矣此日用楚之糧草他日仍以秦兵之餉乾解補未嘗令楚自備兵馬到楚正所謂進勦之處預備支給不責之楚省責之誰乎如謂房竹隔絕楚人不能遠供秦兵何以責令秦人往負楚糧秦人既可往楚人即可來餉道未嘗阻絕不問可知矣如房竹既通師駐鄢地自當鄢人供給何以仍欲秦夫協濟是始終以秦夫為卸擔之路即此一

語楚省之有意故推昭然易見矣興安緣與寇鄰  
凋殘殊甚秦省糧無可買臣是以遣撫民同知麻  
璵齎銀一萬兩前往襄陽召買軍需蚤已移知鄖  
撫正以興安為極窮之地襄鄖為多米之鄉故不  
憚遠冒風波載糧異域今謂興安有糧可以供出  
關之兵免楚省繞道之難是止諳楚之情形而興  
安之凋敝總未計矣不特此也臣於本月初六日  
據興安鎮臣于奮起報稱鄖襄兵馬盡撤赴荆夷

合力於東南山寨各小股是鄖襄一帶全無進勦  
房竹巨寇之兵官民無事儘可備糧以飽客兵乃  
一味誣卸夫豈同舟共事之誼且秦豫兵馬指日  
出關楚省不遵部行蚤為措備反令臣於十餘日  
之內運三萬衆之糧供應於數百里之外神運鬼  
輸尚且不能臣猶夫人也能雨粟湧金乎惟是楚  
藩司劉顯貴糧道吳執忠敢違

俞旨多方推調獨不思兵馬一到枵腹可虞是誰之過

與同為

朝廷臣子同任

朝廷封疆臣萬不敢自生畛域恕已刻人但揆情度勢  
難易攸分臣不得不再疏剖明伏乞

皇上下部速議

勅令楚省督撫遵照前

旨蚤辦糧料草束庶士馬飽騰可望賊寇掃蕩有期矣

第三疏

前人

官兵會勦楚寇必由興安白土關聚集前進應用糧料草束最為急需臣於奉

旨日即移會陝西撫臣併行布政司備辦去後屢據該司呈報措發分守關南道銀一萬三千兩分巡關南道銀一萬一千兩撫治商洛道銀一萬兩各就本地多方買運仍委督糧道韓志道馳赴漢興一帶就近督催又因興地荒殘不能多買再委西安府撫民同知麻璵帶銀一萬兩赴湖省鄖襄產糧

處所買運赴白土關接濟誠諭責成極其嚴切然  
買糧既苦運糧尤艱今據道詳內稱興安州所請  
民夫腳價銀兩最為懇切臣批該司確議亦復諄  
諄呈請良以興屬逼近賊巢百姓原少兼之山路  
崎嶇負送艱難不得不量給腳價以示鼓舞查十  
六年曾經議及腳價旋以奉

旨停勦未有成議但從前輩屬秦徽各州縣運送川糧  
有給過腳價之例似應照例量給責成速運又慮



買價之外無銀可發合無就於發去買運銀內通融支給其漢中商洛兩道所屬買運腳價并湖廣買糧雇船之費亦應各照道里一例查給統俟事完日造冊呈報彙

題銷算事在緊急不得不然惟念前發各銀除給腳價則召買糧料草束自是有限臣雖嚴檄藩司多方搜措恐無米之虞終難源源應手再繹部文內云將原撥元年兵餉款內照數隨營解運備買糧

料草束等項固屬定例第秦省鎮協營路官兵額  
餉每年半本半折非如他省餉銀外月有加米三斗  
如在本處戍防本折兼支自足糊口今抽調遠征  
越山渡嶺道路迢遙斷不能遠攜本色長驅勦寇  
即就折色而論地方豐歉不同米糧貴賤各異欲  
以用兵地方以一兵原餉買足一兵食用萬萬不  
能況節年重撥未撥不敷之餉積至一百二十九  
萬有奇雖經臣於本年十月初六日密疏具

題請撥至今未見部覆當此會勦屆期兵食極宜多  
備必餉銀充裕然後召買有賴無奈司庫如洗點  
金無術臣仰屋莫措憂心若焚今因該司詳請腳  
價不得不迫切並陳於

皇上之前也

密陳防邊要務疏

前人

邊垣為內外之防部議通行修葺奉有

俞旨凡屬臣工敢不祇遵立督告成以仰副我

皇上綢繆未雨之至計臣接准部咨隨即備行各該鎮將等官各照該管疆界作速修舉并移各該巡撫及各邊道就近督催務期早竣聽候

特遣重臣巡閱仍行飭催間除坍塌無多已報鳩工者不計外其餘有稱年遠頽圯已盡物料無資可動者有稱邊長工程甚大操作無人可役者甚至有稱沙土埋沒隨扒隨積山水衝塌基址無存萬難施力者臣思封疆重務豈容借詞推諉復嚴飭舉

行而各鎮道之呈請如故不得不行令估議批據  
藩司彙詳統計秦境邊垣自延綏而寧夏而固原  
而甘肅西寧延袤五千餘里并要隘敵樓墩臺舖  
舍等項傾廢應修者大率過半在昔葺補之制雖  
無案可稽而明季按汛各有屯軍更班應役專力  
邊牆迨天啟年間班軍裁撤暨我

朝定鼎迄今已共四十餘載修葺之舉缺焉不講今  
一旦而欲修數十年之未修葺千百里之未葺良

匪易易往日設有專工何憂不舉今則軍已盡裁  
矣往日有坍即築不難為力今則坍者數多矣往  
日年年興工人心相安今則無事日久一經督責  
共駭聽睹矣且各處邊垣依山傍水地峻則工料  
難前流急則衝激可慮加之風沙不測落成為艱  
况舊例小修則動支部額大修則并發帑金當此  
軍興費繁之際時絀恐難舉羸將專責之兵修而  
各鎮營士卒已經抽調赴楚會勦以及分汛設防

存營者無多抑或濟以民力而此巖疆殘黎久罹  
寇虐蕩析無遺加之饑荒疫死見在者幾何雖驅  
全陝之兵民以供版築竭三秦之賦稅以備物料  
責功於旦夕亦必不得之數也臣思時已及春  
遣員不遠催舉則不能議停則不敢茲據該司冊估  
約用人夫七千八百七十五萬五千一百有奇需  
費銀米五百三十餘萬此外未據報到估計者尚  
不與焉工大費繁臣不敢不據實直陳以俟

睿裁

覆查黃甫川烟稅疏

前人

臣思稅課一項必舊有商集貨市自可連年徵稅  
以佐

國用查黃甫川委係徧小邊隅偶因先年茶商順帶  
之黑烟希圖墊納茶課乃緣坐稅又致罄本賠納  
隨即星散前撫臣張中第目擊其艱故有每包徵  
銀一分之請蓋冀其稅輕或可招商復來不意迄



今商貨兩絕杳無一至非惟逋年之稅課無望而  
從前之逋欠亦萬難追徵矣今經臣查駁該道廳  
營路各官僉稱無商無貨甘心具結夫孰無身家  
功名之念而代商隱稅自干罪戾耶且黃甫川逼  
近殺虎口地方若果有商有貨道路之萬耳萬目  
共覩共聞自所難掩前撫臣林天擎必不敢兩請  
題豁於先今撫臣賈漢復亦必不敢繼請  
蠲免於後也此項烟稅委係無徵仰懇

皇上俯念邊隅之賠苦為難屢查之情確非謬

特賜蠲免在

朝廷不致徒懸稅額之空名而地方臣民可免追徵逋課之實累矣

秦地折正宜仍舊額疏

賈漢復

看得秦省之最荒殘者莫甚於延安府而延安府之最荒殘者莫甚於洛川宜川延川三縣也蓋其地處萬山之中土脈磽薄民力艱難與腹裏地方

大不相同故舊例洛川之地每八畝四分析正一畝宜川延川之地每四畝折正一畝誠以邊陲瘠地難與沃野肥壤并論耳在昔折正之時正賦尚難取盈不意順治十年後興屯道白士麟興屯同知高應選督墾荒地墾一畝即報一畝將三縣所墾荒地俱未折正而洛川又有餘荒不清之糧悉派於興屯之內重累殘黎按數輸納官畏考成而嚴比民若剜肉以醫瘡然物力有限歲歲難完有

扣各州縣官役俸食助解者有道府廳縣各官變  
產捐賠以副考成者苟且補苴以濟一時今則官  
無常賠之力束手聽叅屢被降革民無可剗之肉  
敲扑益嚴逃亡益甚節據各縣申報或父子偕奔  
或兄弟散離甚有全家全戶扶老攜幼棄鄉背井  
者其流離困苦之狀真耳不忍聞目不忍見者也  
臣雖疊檄撫綏無術可施若再不為折正恐丁逃  
累戶戶逃累甲甲逃累里而三縣之糧不惟荒者

勢必難徵將熟者亦轉而為荒矣臣非不知錢糧  
重需司農仰屋但據各縣及司府詳文纍纍盈案情  
詞迫切民不聊生臣安忍坐視不為籲題代民請命耶倘蒙  
皇上睿鑒俯照舊例折正則民無包賠之苦孰無故土之  
思從此招徠生聚庶可漸望起色矣

請豁邠州包賠地糧疏

前人

看得邠州乃山坡之區也地非膏腴民鮮蓋藏辦納  
國課在昔為難兼罹兵燹之後死亡相繼荒榛滿目

所在二三子遺皮骨僅存應輸錢糧每多督催不  
前查節年又捏報開墾地九百五十五頃二十畝  
三分零起徵糧六千三百六十四石一斗四升零  
以紙上之虛數為應得之正賦民受敲扑官受叅  
罰究無分毫實濟嗟此殘黎以見存之丁辦成熟  
之糧終歲辛勤尚苦難支奚堪冒虛墾之名賠無  
地之糧哉若不亟請蠲除將見存者盡逃熟者并  
荒州治漸隳額賦愈不可問矣臣身任地方目擊

最真不敢緘默懇乞

皇上垂憐邠民重困原與別邑不同俯將前項包賠地糧立賜豁免除庶存遺不致逃亡殘黎可望起色矣  
遵諭陳言疏  
前人

伏讀

恩詔內一欵順治十六十七十八年催徵不得各項舊欠錢糧著照蠲免十五年以前錢糧一體蠲免大哉

王言晉天之下率土之濱咸登春臺矣臣愚以為催徵  
不得之錢糧不止順治十六十七十八年為然也  
敢推廣

恩詔蠲免之條為我

皇上詳陳之夫各省錢糧俱有定額自當照數全完何  
年年追徵年年必有拖欠豈盡有司之催科不力  
百姓之頑梗不輸歟揆厥所由各有不得不拖欠  
之勢臣不敢遠舉即如臣屬鳳翔府之岐山等縣



延安府之中部等縣漢中府之西鄉等縣西安府之澄城等縣或寇亂頻仍熟地久成草萊或殺戮靡遺哀鴻未能爰止甚或興屯清丈荒蕪捏為熟田或山坡瘠磽虛畝未經折正有司畏考成之嚴即心切民瘼者不能不加鞭笞以致見丁包賠虛丁熟田包賠荒田包賠不起展轉四方此一經拖欠則年年難完之由也除臣一面嚴行司道府縣清查另疏外以臣屬見聞如此推之各省如臣屬

者諒有同然茲者

皇恩普及順治十八年以前舊欠既經蠲免黃童白叟  
踴躍歡呼自然好義終事力圖輸將竊恐康熙元  
二三年舊欠如前項虛賠等弊仍然追呼枉受鞭  
扑同此百姓既不能償十八年以前之夙逋又安  
能完元二三年之懸額斃斃小民有淚堪灑無肉  
可剜鬻妻賣子流離載道勢所必至與其百姓徒  
受無辜之累

國家未獲分毫之用合無廣沛

皇仁將元二三年拖欠錢糧

勅下該部詳加查核如已徵在官者照數追解果實施  
欠在民必不能完者俱照康熙四年三月初五日

詔赦順治十六七八三年拖欠錢糧之例槩行蠲免在  
九重不過豁紙上之虛數在百姓則可受無窮之實惠  
將見萬姓歡呼於下和氣徵應於上矣

請支兵丁加米疏

前人

看得秦省各鎮營兵丁月餉之外又給加米此從來舊例也嗣該前任督臣題准每年半本半折兼支本色用市斗關領因而減去加米在各鎮營本折兼支者自無異議唯興安一鎮直支折色原無本色其鎮標三營以及興安協守白土紫陽之兵將領到餉銀發民召買維時民既苦於供運兵不免於庫呼是兵與民交困矣隨經前任分守關南道叅議婁應奎詳請前任撫臣馬之先題請部覆

俞允六營之兵每月仍照舊准給加米三斗折銀四錢  
令各兵自買以資食用其漁渡舊縣并漢中協守  
漢鳳陽平畧陽寧羌七營路緣向有興屯本色可  
支故未議及今屯兵已撤屯糧全無而各兵應領月  
餉全支折色兼以興漢地方兵多糧少價值較他  
處騰貴所領一月之餉銀不足半月之食用啼饑  
號寒情實可憫切思各營路均一鎮兵也戍守同  
支折同而加米有無則不同難免向隅之悲所以

該鎮有此援例之請耳當茲

國用匱絀司農仰屋臣非不知增餉為難第漢興一  
帶密邇賊巢分防堵禦在在為然豈可令其枵腹  
荷戈而不為三軍請命耶懇乞

皇上俯念巖疆戍卒之苦一視同仁將漁渡等七營路  
照依鎮標東協之例每兵每月准給加米三斗折  
銀四錢亦令其自買以資糊口庶雨露均霑而敵  
愾可鼓矣

請分轄以肅郵驛

前人

看得秦省鎮防滿漢兵馬日需糧料草束派催支  
放總係督糧道管理量入度出酌盈劑虛剔倉蠹  
核漏卮其事不為不繁其任不為不重也今驛傳  
道奉裁而通省驛鹽事務統歸兼攝且勿論一人  
精力有限肆應機宜難周即人皆明敏事悉刃解  
計西安以達甘寧文移往返動需數月而夫馬錢  
糧鹽引課稅豈能一一盡皆清楚毫無侵蝕逋欠

乎駁查批核即隨呼隨應似亦不能察奸弊於數千里之外也萬一師出倉卒沿途之供應軍前之急需又皆糧道所親身料理不容他委者糧草驛鹽勢難兼顧更如

欽件不能依限結勘合不能救急用是又悞事之明驗也今藩臬二司暨各道議以驛鹽事務照依巡撫分轄地方就近料理公事迺克有濟俱各從地方起見似亦近理但事屬分理職掌併應歸某道兼



攝俱非臣等所敢議也

請蠲拖欠銀疏

前人

看得西延鳳三府屬順治十七年分未完民糧銀  
七千二百三十三兩九錢七分三釐零未完糧九  
百三十七石一斗九升五合零或因控報開墾而  
包賠無力或因戶口凋殘而辦納無人空懸銀糧  
之數終無完報之期節年官民受累情實堪憐所  
當照數豁免以廣

皇仁者也

請蠲廢藩民欠雜疏

前人

看得廢藩地內額征自順治十二年起至十五年止未完本折各項錢糧該前部臣交單逐一清察實欠在民業經

題請蠲免訖尚有各年隨徵綿花布油柿子未邀併請者蓋緣部差止查本折正項而未及雜項故也  
茲奉

上諭覆查拖欠錢糧而綿花布油柿子雖部單未開悉  
屬王土所產之物百姓應納之數或地被崩壓或  
人經死亡有人而無地可耕有地而無人承墾所  
以節年逋欠虛懸紙上實實催徵不得似應照數  
請豁以廣

皇仁者也

延屬丁徭疏

楊素蘊

明季天下之亂起於西北臣鄉延屬實首被其害

李自成張獻忠等縱橫流毒廿餘年老稚殺戮少  
壯擄掠傷心慘目已不忍言繼崇禎十三年天災  
流行父子相食幾無遺類計此方之民半死於鋒  
鏑半死於饑饉今日存者實百分之一皆出萬死  
而就一生者是以原野蕭條室廬荒廢自宜君至  
延綏南北千里內有經行數日不見烟火者惟滿  
目蓬蒿與虎狼而已計非休息生聚費

國家數十年培養之力必不能復元氣而措安全乃

今積困大害更有萬倍於他處者丁徭是也臣絨  
嘿不言則疾苦壅於上聞惟有日朘月削趨死亡  
而已矣臣官直隸即以直隸之錢糧較直隸地畝  
丁糧總名曰條鞭起解存留通融支放每丁銀不  
過一錢二分是以百姓樂輸而易完延屬則不然  
地畝所出者多曰大糧人丁所出名曰條鞭大糧  
以供起解額徵猶有定數條鞭備存留官役之俸  
薪工食出其中師生廩餼出其中此猶曰必不可

已之經費甚至各上司提冊催號之使費出其中  
各差役需索供應之繁亦出其中而本州縣驛遞城  
守諸務又種種出其中嗟嗟百孔千瘡何一非此  
晨星落落半死亡之膏血哉故每丁每歲有費至  
三兩者有費四兩者較之一錢二分之額徵其相  
去寧止倍蓰夫延安處萬山之中土地寒薄收穫  
有限數年來金生粟死成米數石僅能易銀一兩  
且人復皆賦資愚魯不善治生商賈又別無舟車

經營運用之方株守本業積蓄幾何即罄上戶之  
產尚不足供終歲三丁之費而况鵠面鳩形啼餓  
號寒者乎是以淳樸者鬻賣男女以償其奸滑者  
非攜家遠徙則挺而走險耳每見開徵之期父子  
感額夫妻愁歎相率捐親戚棄墳墓者纍若喪家  
之狗失巢之鳥進無所依退無所據流離瑣尾良  
可惻然即官其地者覩顛連光景亦皆有死之心  
無生之樂然事勢所迫補救無術惟有飲泣太息

而已矣若不早破除此弊恐非盡延安之民驅於  
樂土盡延安州縣胥為荒丘不止也伏祈

皇上痛念此一方子遺

勅下該部行令彼處撫按道府力加釐正額定款項丁  
少費多不敢望如一錢二分之輕亦宜曲為調劑  
去無益俾不至重困難支則奄奄殘黎庶漸有起  
色乎

告急請兵疏

俞亮



切神木副將孫崇雅久蓄叛志為賊聲援迎賊入  
城肆行淫掠殺害道臣戮及縣官欲圖不軌調臣  
繳印伏念臣讀書學古世守忠孝臣子大義講之  
有素位卑無兵不能滅賊內省諸心已負重罪豈  
肯從逆以背

天恩但邊堡無兵更值調盡臣雖逆知此賊無謀以逆  
順禍福勸諭軍民共相堅守然一路惶惶人心盡  
變孤立無援呼天莫應孤山去神木百三十里朝

發夕至若一有失榆林道絕黃河失險恢復甚難  
今特差臣弟庫戌科進士俞京前來請兵臣恐死  
以待伏望

皇上速發大兵以解倒懸以救萬民

請豁濱河地糧永禁現役馬頭疏 劉蔭樞

秦豫濱河衝坍田地宜行核豁查黃河在秦者由  
龍門出山南至潼關將三百里高原田地常無水  
患獨埕下濱河灘地東西相望遠者三十里近者

將二十里除河水經流之地原無錢糧其去河稍遠之處俱照中地起科河之在豫者自滎澤出山東至虞城將五百里堤內中地常無水患惟堤外南北相望遠者二十里近者十餘里除河水經流之地原無錢糧其去河稍遠者俱照下地起科河性激怒常好灣曲而行一經掃刷動至數里坍入水中是地既去而糧仍存也有司各官以分數計之不及十分之一又漸次衝坍與衝決不同不敢

具文報災督撫坐鎮省會何由周知臣思我

皇上一行蠲賑動至數百千萬豈忍濱河百姓獨有向

隅祈

勅督撫細行查核量為豁減賠累去而室家安皆

皇仁之推廣也一在秦現役馬頭當永行禁革查督催

正項錢糧有催頭糧長民樂自應此海內所同也

獨秦省自故明以來催頭糧長之外有現役馬頭

名色每里分為十甲十年一輪週而復始時行時

止莫可稽考三逆變亂而後軍興旁午接濟一時  
勢所必需然此時所辦者皆公事也事平之後相  
沿未革不肖有司巧為侵漁彼不立私派之名而  
令民間自派每里報殷實大戶數人常在衙前供  
役假辦公之名為濟私之計現役馬頭均令辦應  
臣查別省州縣正項之外亦有必需差徭然皆為  
數無幾闔縣公應民不為苦獨秦省十甲輪流是  
一年辦十年之事一人應十人之役故民當應役

之年計其所費倍於正賦

皇上軫念秦民災傷百法拯救地方大吏三令五申時  
行禁飭其稍知愛鼎者自行約束而貪墨不肖者  
猶陽奉而陰違也臣查定例內州縣官私行徵派  
與上司各官不行糾察者載在條例處分甚嚴但  
法猶器也器具而不用久而必敝法立而不行久  
而必玩祈

勅下督撫嚴加申飭將從前積習永行斷絕則橫索去

而民樂業皆

皇仁之推廣也臣亦知臣所言者皆有定例遵行在案  
但伏讀

恩詔煌煌謂現行事例不便於民者令督撫詳察具奏  
仰見我

皇上明燭萬里知現行之例誠有宜因時而變通者也  
再請通豁雜項錢糧

佛倫

竊惟秦省西鳳地方災荒致厯

皇上軫念將康熙三十二年地丁銀米并從前積欠未完錢糧通行蠲豁從此被災殘黎得以安業者皆我

皇上生全之矣臣蒙

特簡畀以川陝重寄凡有關於災黎休戚事宜敢不據實入

告以圖副

皇上惠愛元元之至意臣查西延鳳漢四府并興安州



康熙三十二年尚有課程銀一千八百六十三兩  
零匠價銀二千九百一十八兩零學租糧一千二  
百三十七石九斗零租銀一百五十四兩零棉花  
六十斤以及無額牲畜地稅等銀以上係雜項不  
在蠲豁之內但課程匠價銀兩皆出於商賈匠役  
至於學租與夫牲畜地稅等銀皆征輸於民不惟  
商賈寥寥且匠役即係災黎今我

皇上浩蕩洪恩將節年積欠并三十二年正賦俱已蠲

豁若又徵此雜稅等項不肖官員既無應征正賦  
不無借端混徵累民之弊前項雜稅等銀為數無  
多合無再邀

皇恩柴行蠲豁庶被災百姓得以均沾實惠而官役混  
徵之弊亦可杜絕矣

兵糧請照舊斗支給疏

朱植仁代稿

博濟

欽惟我

皇上體天育物凡兵民日用以及大小事宜無不經營

睿慮措置咸宜去歲秋間特奉

諭旨念民間所用升斗大小不同令部臣較鑄平準通行頒發使普天畫一率土均平此實

皇上之大政不易之章程查各省收糧倉斗大槩相同惟陝省倉斗較別省獨大故各屬民糧俱照依陝省舊用倉斗交納亦即以此倉斗支放兵丁百姓交納為常不覺其苦兵丁日用無缺俱已深荷

天恩今以部頒新斗以陝省舊斗較量一石計短少三

斗如以此新斗收受即以此新斗放給兵丁則十分之中已減其三分兵馬糧料不無艱窘不足之慮況陝甘兵馬較他省最多倘有行走全賴士馬飽騰臣遵奉

諭旨將私派雜差重耗等項嚴行禁革惟收糧浥爛折耗額外多收者未能盡絕今將此耗糧亦永行禁革百姓交糧令照舊斗之數以新斗交收支給兵糧亦照舊斗之數以新斗量給則耗糧革絕百姓

即已沾沐

皇上弘恩自是樂輸恐後而陝甘滿漢十餘萬兵丁亦俱仰沐

聖主格外深恩矣

查勘渭河并募江南船工水手疏

鄂海

伏惟我

皇上軫念民依籌畫地方至詳且悉向因山陝不通河道間遇荒歉輒運艱難時時上廩

聖懷多方賑恤去歲

駕幸西安路經晉豫省方問俗之餘相度山川形勢以  
汾渭兩河直與黃河相通而河南府居於各省之  
中水路四達截留漕糧積儲備用倘山陝需糧即  
可修造船隻由黃輓運若三門船不能上亦可造  
船剥運由汾渭以抵山陝我

皇上聖明洞照脣畧淵深凡有可以利民生籌積貯無  
不處置盡善纖悉無遺所以創萬年經久之模而

不為一時權宜之計也除遵

旨查勘三門情形已經會疏題報外臣考諸記載渭河源流綿長一千九百里發源於臨洮府渭源縣之鳥鼠同穴山不過山澗細流直至鳳翔府寶雞縣之到底地方始成平川自到底東流至華陰縣之三河口投入黃河古所稱秦川八百里者是也向可通行船隻利濟甚普今皆湮廢但查咸陽以東現有買賣煤米往來客船而咸陽以西行船絕少

恐有淤墊臣仰體

皇上疏通河道裨益商民之至意自會勘三門回署即輕裝減從前赴寶鷄則由陸路自寶鷄回省則水陸間行一路查勘惟寶鷄至郿縣一百四十餘里雖河面甚寬水勢亦不甚溜但水落之時重載難行而郿縣以東河深水平行走重船並無阻塞臣查渭河西至鳳翔東至潼關由渭入黃由黃入汾則可抵山西之平陽即或三門水溜客商不敢冒



險而汾渭兩河可通船隻者幾二千里然往來之  
行旅商賈多捨水路而就陸路者皆因陝西船隻  
方頭平底無柁無篷而水手又不善於操舟順流  
尚可日行五六十里逆流則挽拽而上止可日行  
二三十里舟行遲滯多費時日不如陸路利便所  
以舟行者甚少臣思河路行走必船隻快利水手  
熟練商民便於往來方能疏通河路臣同督臣博  
濟當酌量捐資於江南等省僱覓造船良工並熟練

水手量水性以造船裝柁置篷使本地匠人士民  
學習演試如果利便可行令民船亦照式修造倘  
陝西收歛需用河南積儲糧石之時即可將商民  
船隻雇覓輓運並可不必另行造船且汾渭之河  
路䟽通漸次或可通黃俾商旅人民均沾利澤以  
仰慰

聖天子愛養元元之至意

請減丁銀䟽

岳鍾琪

臣查陝省地方自我

皇上御極以來比年豐收從前逃荒之民到處皆漸次  
復業而惟延安府屬則復業者甚少細加察訪皆  
因丁銀重累不特已逃者不敢來歸抑且現在者  
皆云思去臣等不勝驚駭因逐一檢查通省丁條  
糧額乃知其弊在明朝時額則定例之過重非  
本朝體恤之不至也查賦役全書內開延安府屬原  
額人丁一十五萬二千有零順治七年奉

旨免過逃亡七萬七千有零順治十一年又奉

旨免過續逃丁六千八百有零及康熙六十年內八年

十六年二十二年陸續奉

旨又免過水淹逃亡殺傷及包賠人丁共一萬有餘是  
本朝之

聖聖相承恩施無已亦可謂蠲貸之施至切至極矣而地  
方終無起色荒蕪終不盡開者總因明時初定丁  
額之際不知是何詭弊延安府則竟有每丁至四

五錢以至七八錢及一兩以外者臣初閱之時猶疑丁銀較重或其糧則少輕及查其田地征糧科則則又皆彼此相若無甚懸殊夫同為

盛世之民同為丁徭之賦而獨此一方多一丁即多四五六七錢或一兩以外之累胼胝小民實難堪此况荒年逃亡之丁又責令未逃者賠納無怪乎逃者不敢歸而在者皆思去臣以為此時若將逃丁逐一清出仰請照前豁免則

聖主隆恩自邀俞允但丁銀之重例不減則逃者難免而未逃者似不能堪欲流民復業終不可得不如將延安府屬各州縣民屯丁銀但照每丁二錢科則則凡有過二錢者皆與減免除中部神木二縣外合十七州縣民屯共應銀一萬四百七十兩二錢較之現今十七州縣歲征丁銀二萬三千三百六十餘兩止減去銀一萬二千八百九十兩有零而現在之民共相樂業逃亡之民聞風自必漸歸

即外來之民聞風自樂就墾將來五年編審按丁  
漸加諒此一萬有零之丁銀自亦不難仍復而於  
國賦固可無虧於地方尤可漸闢邊地遐荒實有  
裨益也倘蒙

恩允某州縣應免丁銀若干之處俟部文至日檄行布  
政司轉發該府州縣查明造具編冊另疏具題  
改設水利通判疏

查郎阿

臣查西安府屬涇陽縣之龍洞鄭白等渠水勢流

行向為涇陽醴泉三原高陵臨潼五縣灌溉之利  
因歷年久遠修濬失宜遂致渠道淤塞堤岸坍塌  
雍正五年督臣岳鍾琪欽遵

諭旨動給正項銀兩委員築濬伏查龍洞鄭白等渠之  
右山徑遠迤山間衆泉涓溢轉匯入渠若使渠深  
堤固則水利之功十居其七又從前開鑿龍洞引  
涇入渠為利甚溥但涇水漲發濁而多泥每於冬  
春之間水落泥澄引涇灌田甚屬有益再於水漲



後田苗暢茂之時用水甚廣酌引灌溉亦稱利便如遇水勢泛濫田苗初生之後涇水衝入渠內不特渠腹受淤抑且禾苗被壓是涇水止可隨時酌用非四時俱可咸資曾悉心諮詢於龍洞之口建閘數座俾蓄洩得宜以資樂利第思水利所關緊要凡濬修啟閉各民戶受水時日皆須大員專理查西安府管糧通判原管慶豐等倉糧石今倉糧統歸西安糧鹽道經管而倉房折運省城改作積

貯倉廩通判一官並無所司之事若將西安府管糧通判改為水利通判專管龍洞鄭白等渠水利除地方事務不許干預外其涇陽醴泉三原高陵臨潼五縣內民戶受水時日堤渠修濬事宜以及閘座啟閉令通判不時親往經理如有奸民勢豪盜水霸佔並有關於渠政利弊者俱令通判稽察整飭倘地方官徇庇阻撓即行揭報叅處再通判向駐省城去龍洞一日有餘中間相隔涇渭二河

夏秋河水陡發往來不便今擇於涇陽縣屬之王  
橋鎮地方在龍洞之東南相去止三十餘里與各  
渠咫尺相隣一切稽查甚屬便易應將通判移駐  
於彼所需衙署酌估蓋給其書役原有額設足供  
差遣不必另有增益至原領通判關防係管糧字  
樣今改為水利通判應另鑄水利通判關防換給  
似屬允協

陝西通志卷八十六